



## 看電影

佢盡好看電影。花兩百零銀買一張票，坐在暗暗个電影院裡肚兩點鐘，就做得看一齣完整个故事，比起電視个連續劇做到拖棚看毋煞，該感覺好加多也。

電影係建築、雕塑、繪畫、音樂、詩、舞蹈、戲劇後个第八藝術，佢係有表演、耳公聽聲感覺、目珠看影感覺个綜合藝術。愛拍一齣電影無佢簡單，愛先有主題靈感，編劇寫出劇本，導演擇選適合个人來擔任各種个角色，尋場景來拍片仔，配上背景个音樂，拍好又有後背个製作，剪接出原本劇本想愛表現个順序。拍好也愛做宣傳，會有電視个廣告、有大張个海報、開記者會，有兜還會設計相關个文創商品。續來就等觀眾行人電影院也！

最早期个電影係無聲个，會有一個人影在影片脣口講劇情，還愛講裡背个人物講个對話。烏白个電影進步到聲音同影片做得共下播出，就有越來越多人合意去看電影。電影發展無五十年，就又進步到彩色个電影。到今，除核有兜危險个動作，會尋同主角身裝差毋多个人代佢來演出，分片仔越至刺激；還有蓋多用電腦技術做出來个特殊效果，分電影有越高个欣賞價值。

佢盡愛看動作片仔。在現實个生活裡背，總係希望毋會堵著暴力个事情，毋過，看著電影裡背个壞人，最尾分人打到半生死、分警察仔扭去，關到生蟲嘛，心肝肚實在盡暢、盡爽快！就會一直相信，世間項定著有「善有善報、惡有惡報」个道理。佢也好看帶細人仔去看人公仔卡通電影，聽著每一個細人仔都噓到咭咭滾，差一息仔對凳仔項拌下來，自家也會躑躑踆等緊噓。係準講大人也做得像細人仔佢仔每日無愁無慮，毋知有幾好正得！佢還好看劇情片仔，這滿每個人都有手機仔，通訊方式佢利便，毋過人同人个心嘎盡遠，盡像戴等假面殼仔，假情假意無就假堅耐。佢會分這兜愛情、親情、朋友情个電影裡肚，某人也係某句話感動到流目汁，毋使在隔壁毋識个人面前假詐堅強。

佢從來毋敢看鬼仔電影，驚啊看煞歸地會發夢、發青暝。佢也毋好看文藝愛情片仔，因為大體都係一對一對个男女朋友去看，佢正毋愛去鬥鬧熱哦！電影還有蓋多種類，像紀錄片仔、科學奇妙片仔、歷史故事片仔、喜劇片仔、相戰片仔、災難片仔、音樂舞蹈片仔，每種電影都有支持个人，會錫無共樣个人去欣賞。

看電影正經係好个休閒活動，今就好帶等零嗒、攞等涼水，入去電影院，坐在軟軟个膨凳椅，吹等冷氣，欣賞一齣好電影。

作者：吳秀梅

### ☆詞彙學習☆

【雕塑】diau' zog`：雕塑。

【擇選】tog xien`：挑選。

【人公仔】ngin` gung' e`：漫畫人物。

【咭咭滾】gid gid gun`：形容咯咯咯的笑聲。

【拌下來】pan' ha' loi`：摔下來。

【係準講】he zun` gong`：假使，若是。

【堅耐】gian' ngai`：堅忍。

【假詐】ga` za`：假裝。

【發青暝】bod` qiang' miang`：夢囈。